

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ŽEPČU**

Broj: 044-0-SU-26-000025

Žepče, 14.01.2026. godine

Općinski sud u Žepču, po predsjednici suda Dragici Dragičević, na temelju člana 31. stav 1 Zakona o sudovima („Službene novine Federacije Bosne i Hercegovine broj 38/2005, 22/2006, 63/2010, 72/2010, 7/2013, 52/2014 i 85/2021) u postupku implementacije Zakona o zaštiti ličnih podataka („Službeni glasnik Bosne i Hercegovine broj 12/2025), donosi sljedeća:

PRAVILA PRIVATNOSTI

Cilj Pravila privatnosti Općinskog suda u Žepču (u daljem tekstu Sud) u skladu sa članom 14. Zakona o zaštiti ličnih podataka (u daljem tekstu Zakon), je da svim osobama, čije lične podatke obrađuje, pruži osnovne informacije o navedenoj obradi na transparentan način.

1. Pravni temelj za obradu ličnih podataka

Vaše lične podatke Sud obrađuje u skladu s članom 8 stav 1 tačka c) i e) Zakona, izvršavajući svoje pravne obaveze i ovlaštenja.

2. Svrha obrade ličnih podataka

1. Vaše lične podatke Sud obrađuje ispunjavajući svoje pravne obaveze u skladu s članom 8 stav 1 tačka e) Zakona u svrhu:

- izrade statističkih, strateških i drugih analitičkih dokumenata,
- odgovora na zahtjeve za slobodan pristup informacijama,
- evidencije stranaka, njihovih zakonskih zastupnika i punomoćnika, notara i drugih osoba koje se evidentiraju u informacijski sistem za automatsko upravljanje predmetima (CMS),
- upisa podataka u druge evidencije koje Sud vodi na temelju zakona
- rada u Sudu
- izrade ostalih dokumenata u okviru realizacije naloga utvrđenih od strane Visokog sudskog i tužilačkog vijeća Bosne i Hercegovine

2. Vaše lične podatke Sud obrađuje na osnovi legitimnog interesa iz članka 8 stav 1 tačka f) Zakona u svrhu:

- sudjelovanja sudaca, stručnih suradnika, namještenika i drugih uposlenika Suda na edukacijama i predavanjima
- sudjelovanje drugih osoba koje nisu uposlenici Suda, u slučajevima kada Sud organizira edukacije, predavanja ili slične aktivnosti.

3. Prava nositelja podataka u vezi sa obradom ličnih podataka

- **Pravo na pristup ličnom podatku** - u okviru ovoga prava mogu se tražiti informacije o svrsi obrade, kategoriji ličnog podatka koji se obrađuje, predviđenom roku u kojem se čuva lični podatak, primatelju ili kategorijama primatelja kojima je lični podatak otkriven ili će biti otkriven. Pristup ličnom podatku može biti ograničen samo u slučajevima kada je posebnim zakonom propisano ograničenje.

- **Pravo na ispravak ličnog podatka** - pravo zahtijevati ispravljanje ili dopunjavanje netočnog ličnog podatka ako podatak nije tačan i potpun. U zahtjevu navesti šta nije tačno i potpuno te u kojem smislu bi trebalo navedeno ispraviti te dostaviti potrebnu dokumentaciju u prilog svojih navoda.
- **Pravo na prigovor** - pravo u svakom trenutku podnijeti prigovor kontroloru podataka na obradu ličnog podatka u skladu s članom 8 stav 1 tačka e) ili f) Zakona, uključujući profiliranje utemeljeno na tim odredbama.
- **Pravo na brisanje** - ako lični podatak više nije potreban za svrhu za koju je prikupljen, ako je nositelj podatka povukao saglasnost na kojoj je obrada utemeljena, ako je nositelj podatka uložio prigovor na obradu u skladu s članom 23 stav 1 Zakona i ne postoje zakonski razlozi za obradu ili je nositelj podatka uložio prigovor na obradu u skladu s članom 23 stav 2 Zakona, ako je lični podatak nezakonito obrađen, ako ne postoje drugi pravni osnovi za obradu podatka.
- **Izuzeci za ostvarivanje prava na brisanje** - radi ostvarivanja prava na slobodu izražavanja i informisanja, radi poštivanja zakonske obveze kojom se zahtijeva obrada propisana posebnim zakonom, a koja se primjenjuje na kontrolora podataka ili radi izvršenja zadatka koji se obavlja u javnom interesu ili u izvršenju službenih ovlasti dodijeljenih kontroloru podataka, u svrhe arhiviranja u javnom interesu, u svrhe znanstvenog ili povijesnog istraživanja ili u statističke svrhe u skladu s članom 56 stav 1 Zakona, u mjeri u kojoj je vjerovatno da se pravom iz stava 1 može onemogućiti ili ozbiljno ugroziti ostvarivanje ciljeva te obrade ili radi postavljanja, ostvarivanja ili obrane pravnih zahtjeva.

4. Sigurnost ličnih podataka

Podaci se obrađuju tako da se osigurava odgovarajuća sigurnost ličnih podataka, uključujući i zaštitu od neovlaštene ili nezakonite obrade i od slučajnog gubitka, uništenja ili oštećenja primjenom odgovarajućih tehničkih ili organizacijskih mjera.

5. Prijenos ličnih podataka drugim kontrolorima podataka

Lične podatke sud prenosi drugim kontrolorima podataka- pružateljima informatičko-komunikacijskih usluga sa kojima ima sklopljen ugovor i na način da se poštuju pravila postupanja sa ličnim podacima. Lične podatke sud će dati trećoj strani ukoliko je to potrebno za izvršavanje zakonom propisanih obaveza treće strane ili ukoliko je to neophodno za izvršavanje legitimnih interesa treće strane. Lične podatke Sud neće prenositi u svrhu direktnog marketinga.

6. Vremenski period čuvanja ličnih podataka

Lični podaci se čuvaju onoliko koliko je potrebno za svrhu zbog koje se obrađuju. Lični podaci se mogu čuvati i duže vremensko razdoblje, nakon prestanka svrhe za koju se obrađuju, gdje se čuvaju u arhivi onoliko vremena koliko obavezuju zakonski propisi o arhivskoj građi.


7. Podaci o službeniku za zaštitu ličnih podataka

Krunoslav Dropulja, viši referent upisničar
E-mail : krunoslav.dropulja@pravosudje.ba
Tel.: +387 32 881-453

Službenik za zaštitu ličnih podataka ne daje pravne savjete drugim kontrolorima i obrađivačima podataka. Osnovna uloga službenika je davanje savjeta i preporuka o obradi ličnih podataka rukovodstvu i uposlenicima Suda koji rade na poslovima obrade ličnih podataka, te nositeljima ličnih podataka čiji se lični podaci obrađuju od strane Suda.

8. Kontakt informacije

Općinski sud u Žepču, Zagrebačka bb, 72230, Federacije Bosne i Hercegovine, Bosna i Hercegovina, tel.: +387 32 881-453; fax.: +387 32 880 326; e-mail: opsud-zepce@pravosudje.ba



Predsjednica suda
Dragica Dragičević